



გორის მუნიციპალიტეტის

საკრებულოს

განკარგულება №32

2021 წლის 12 თებერვალი
ქ.გორი

გორის მუნიციპალიტეტის მერიის ეკონომიკური სამსახურის ტრანსპორტისა და გარე რეკლამის რეგულირების განყოფილების 2020 წელს გაწეული საქმიანობის ანგარიშის შეფასების შესახებ

გორის მუნიციპალიტეტის საკრებულო, მის მიერ მიღებულ გადაწყვეტილებათა შესრულებაზე, მერიის საქმიანობაზე, თვითმმართველი ერთეულის ქონების მართვასა და თვითმმართველი ერთეულის ბიუჯეტის შესრულებაზე ახორციელებს კონტროლს. აღნიშნული კონტროლის განხორციელების ერთ-ერთ ფორმას წარმოადგენს ანგარიშის მოსმენა, რომელიც გაწერილია საკრებულოს სამუშაო გეგმებში. საკრებულოს სამუშაო გეგმის შესაბამისად საჭიროა მოსმენილ იქნას და შეფასდეს გორის მუნიციპალიტეტის მერიის ეკონომიკური სამსახურის ტრანსპორტისა და გარე რეკლამის რეგულირების განყოფილების 2020 წელს გაწეული საქმიანობის ანგარიში.

საქართველოს ორგანული კანონის „ადგილობრივი თვითმმართველობის კოდექსის“ 24-ე მუხლის 1-ლი პუნქტის „გ.ა“ ქვეპუნქტის და 61-ე მუხლის 1-ლი და მე-2 პუნქტების შესაბამისად:

1. დადებითად შეფასდეს გორის მუნიციპალიტეტის მერიის ეკონომიკური სამსახურის ტრანსპორტისა და გარე რეკლამის რეგულირების განყოფილების 2020 წელს გაწეული საქმიანობის ანგარიში (დანართი თან).
2. განკარგულება ძალაში შევიდეს ხელმოწერისთანავე.
3. განკარგულების გასაჩივრება შესაძლებელია დაინტერესებული პირის მიერ მისი გაცნობის დღიდან ერთი თვის განმავლობაში სარჩელის წარდგენის გზით გორის რაიონულ სასამართლოში (მისამართი ქ. გორი, სერგო ჯორბენაძის ქ. №30).

საკრებულოს თავმჯდომარე



დავით რაზმაძე

ტრანსპორტისა და გარე რეკლამის რეგულირების განყოფილების 2020 წლის სამუშაო ანგარიში

ტრანსპორტისა და გარე რეკლამის რეგულირების განყოფილებაში მუშაობს სამი თანამშრომელი: განყოფილების ხელმძღვანელი და ორი სპეციალისტი. განყოფილების მიერ მომზადებული პროექტის მიხედვით მოხდა შესყიდვა 54 ათასი ლარის ავტომობილის სიჩქარის შემანელებელი ხელოვნური უსწორმასწორობების შემადგენელი მასალების, შესაბამისი საგზაო ნიშნებით (365 გრ.მ; 180-ცალი საგზაო ნიშანი), რომლის მიღება-ჩაბარება განახორციელა ტრანსპორტისა და გარე რეკლამის რეგულირების განყოფილებამ, ხოლო მონტაჟს ახორციელებს ა(ა)იპ გორის კეთილმოწყობის სააგენტო და ამით მოგვარდება გორის მუნიციპალიტეტის ადმინისტრაციულ საზღვრებში, ადგილობრივი მნიშვნელობის გზებთან მდებარე სკოლების და ბაგა-ბაღების მიმდებარე ტერიტორიებთან ხელოვნური უსწორმასწორობების მოწყობა

განყოფილების მიერ, შინაგან საქმეთა სამინისტროს საპატრულო და კრიმინალური პოლიციის დეპარტამენტების შიდა ქართლის სამმართველოებთან ერთად შესწავლილი და მომზადებული იქნა საგზაო ნიშნების განთავსების საკითხი გორის მუნიციპალიტეტის ადმინისტრაციულ საზღვრებში, რომლის შედეგადაც გორის მუნიციპალიტეტის საკრებულომ წლის განმავლობაში გამოსცა 30-მდე განკარგულება და გორის მუნიციპალიტეტში დამატებით მოეწყო 130-მდე საგზაო ნიშანი და აბრა.

განყოფილების მიერ შესწავლილი იქნა გორის მუნიციპალიტეტის ადმინისტრაციულ საზღვრებში მდებარე საერთაშორისო და შიდასახელმწიფო მნიშვნელობის გზებზე საგზაო მოძრაობის უსაფრთხოების საკითხები და აქედან გამომდინარე გორის მუნიციპალიტეტის მერიამ წლის განმავლობაში რამდენჯერმე მიმართა თხოვნით საქართველოს საავტომობილო გზების დეპარტამენტს, რის შედეგადაც დეპარტამენტმა გორის მუნიციპალიტეტის დასახლებებში, ათეულობით ლოკაციაზე დაამონტაჟა ავტომობილის სიჩქარის შემანელებელი ხელოვნური უსწორმასწორობები, შესაბამისი საგზაო ნიშნებით.

წლის განმავლობაში განყოფილებამ, ა(ა)იპ გორის კეთილმოწყობის სააგენტოსთან ერთად რამდენჯერმე განახორციელა პარკირების ადგილების ნუსხაში ცვლილებები, როგორც მოხდა დამატება, ასევე შემცირება, რაც ძირითადად გამოწვეული იყო ქალაქ გორის ზოგიერთ ქუჩაზე ველოსიპედის ზოლის მოწყობასთან.

განყოფილების მიერ, შინაგან საქმეთა სამინისტროს წარმომადგენლებთან ერთად განხორციელდა ავტოსატრანსპორტო საშუალებების სახელმწიფო ნომრის ამომცნობ პროგრამულ უზრუნველყოფასთან თავსებადი ვიდეო-სამეთვალყურეო და გარე პერიმეტრის ხედვის კამერების ყოველთვიური მომსახურების მიღება-ჩაბარება.

მუნიციპალიტეტის ადმინისტრაციულ საზღვრებში განყოფილებამ ჩაატარა კანონდარღვევით განთავსებული სარეკლამო აბრებისა და ბანერების გამოვლენის ინსპექტირება. რის შემდეგაც თითოეულ დამრღვევზე შეიქმნა გაფრთხილების წერილები, რომლებიც გადაცემული იქნა შესაბამის სამსახურებს შემდგომი რეაგირებისათვის.

გორის მუნიციპალიტეტის მერიასა და შპს თბილისს შორის დადებული ხელშეკრულების შესაბამისად, განყოფილების მიერ შესწავლილი იქნა საგზაო მონიშვნების დეფექტები, რის შედეგადაც შპს თბილისმა ქალაქ გორის ქუჩებში განხორციელდა ასფალტის ჰორიზონტალური მონიშვნები თავისი ხარჯებით.

2020 წელს, 3 დღით განყოფილების თანამშრომლები მივლინებული იყვნენ ქალაქ ბათუმში, რადგან შეესწავლათ მუნიციპალური ტრანსპორტის მუშაობის სტრუქტურა, ასევე მერიის სხვა ხელმძღვანელ პირებთან ერთად მონაწილეობდნენ სამგზავრო ავტობუსების შემოყვანასთან დაკავშირებით, როგორც ევროპის განვითარებისა და რეკონსტრუქციის ბანკთან, ასევე საქართველოს მუნიციპალური განვითარების ფონდთან მოლაპარაკებებში.

განყოფილების მიერ, იურიდიულ განყოფილებასთან ერთად მომზადებული იქნა შემდეგი დადგენილების პროექტები:

„გორის მუნიციპალიტეტის ადმინისტრაციულ საზღვრებში რეგულარული სამგზავრო გადაყვანის (M2 და M3 კატეგორიის ავტოსატრანსპორტო საშუალებებით) ნებართვის გაცემის ფასის განსაზღვრის, ნებართვის მაძიებელთა კონკურსში მონაწილეობის, მასში გამარჯვებულის გამოვლენის, ნებართვის მოქმედების ვადის, სანებართვო პირობების, ნებართვის გაცემისა და ფასის გადახდის წესის, სანებართვო მოწმობის, უწყებრივი სანებართვო რეესტრის (ჟურნალის) და კონკურსის წესით გამოვლენილ გამარჯვებულთან გასაფორმებელი ხელშეკრულების ფორმების და სანებართვო მოწმობის შევსებისა და აღრიცხვა-ანგარიშგების წესის დამტკიცების შესახებ“;

„გორის მუნიციპალიტეტის ადმინისტრაციულ საზღვრებში M2 და M3 კატეგორიების ავტობუსებით რეგულარული სამგზავრო გადაყვანის ტარიფის განსაზღვრის შესახებ“

„გორის მუნიციპალიტეტის ადმინისტრაციულ საზღვრებში რეგულარული სამგზავრო გადაყვანის მიზნით ავტობუსების (M2 და M3 კატეგორია) მოძრაობის მარშრუტების დამტკიცების შესახებ“

„საქართველოს ადმინისტრაციულ სამართალდარღვევათა კოდექსის 135-ე მუხლით გათვალისწინებული სამართალდარღვევისას საჯარიმო ქვითრის - ადმინისტრაციული სამართალდარღვევის ოქმის ფორმის, მისი შედგენის, ჩაბარების, აღრიცხვა-ანგარიშგებისა და გასაჩივრების წესის დამტკიცების შესახებ“;

„საქართველოს ადმინისტრაციულ სამართალდარღვევათა კოდექსის 130-ე მუხლის მე-4 ნაწილის „ა“ ქვეპუნქტით (მუნიციპალიტეტის ადმინისტრაციულ საზღვრებში

რეგულარული სამგზავრო გადაყვანის M3 კატეგორიის ავტობუსით უბილეთო მგზავრობა) გათვალისწინებული სამართალდარღვევებისას საჯარიმო ქვითრის (ადმინისტრაციული სამართალდარღვევის ოქმის) ფორმის, მისი შევსების, ჩაბარებისა და წარდგენის წესის დამტკიცების შესახებ“.

რომლებიც დამტკიცებული იქნა გორის მუნიციპალტეტის საკრებულოს 2020 წლის ნოემბრის მორიგ სხდომაზე.

განყოფილება დროულად რეაგირებს შემოსულ წერილებზე და კორესპონდენციებზე.